

Numeros

Mgo Nabadyaan to mgo Otow to Israil to Dio Sikandan to Han-hanawan

Ka Igbolig to Mgo Taagpanubad

6²² Nignangon ka Magboboot ki Mosis to, ²³“Nangoni nu si Aaron woy ka mgo anak din no lukos to ‘Soini ka ogkagion now ko ogbolig kow to mgo otow to Israil. Nangoni now sikandan no kagi: ²⁴““Ogkaboligan ka woy ogkabantadyan ka poron to Magboboot; ²⁵Ogkaadyagan ka poron to langlanguan to Magboboot woy ogkoid-uan ka rin; ²⁶ipatangko poron to Magboboot ka langlanguan din koikow woy ogkabogadyan ka to maawang no goinawa.”” ²⁷“No sikan ian no isabuk dan ka ngaran ku dio to mgo otow to Israil woy ogboligan ku sikandan.”

Logpad to Pog-aaras

11¹ No kuntoon, nig-aaras ka mgo otow tongod to mgo koirapan dan woy nigdinog ka Magboboot. To pogdinog to Magboboot kandan, napukow ka kabou din. Pigpa-aap sikandan to Magboboot to niglogdog no hapuy woy nasilaban ka duma no mgo tukbung to ilis to pig-ugpaan to mgo otow. ²To pogpannanoy to mgo otow ki Mosis, nigpanubad sikandin duon to Magboboot woy no-obukan ka hapuy. ³No pighingaranan dan ka sikan no ugpaan to Tabira no to kanta pad ‘Poglogdog’, hoo su niglogdog ka hapuy to Magboboot taliwaro kandan.

⁴Duon mgo duma ran no konon kapunganan ni Israil, woy nanasablok soini no mgo otow, woy agad ka mgo otow to Israil nigbunsud to poglaangot no kagi ran “Agad ko duon ogkakoon ta no sapu poron! ⁵Nakadoromdom koy to mgo isda no nakoon noy dio to Ehiptu no waro badyad, woy ka mgo pipinu, mgo baabowan, mgo gulay, mgo sibuyas woy ahos no duon. ⁶Di kuntoon napowahan ki; waro loin no ogkitoon ta ko konon soini no manna!”

⁷Ka manna un-unawa to kabkab to balanghoy woy unawa to saong pitawon. ⁸Nigpamurut ka mgo otow to manna, woy piggagaling dan woy ko pigbinadyu ran. Pigsugba ran ka duma woy pighimu ran no

pan ka duma. Ka nanam un-unawa to pan no pig-amutan to lana to olibu. ⁹To poglogsad to domhug to pig-ugpaan to mgo otow kara maukilom, songo niglogsad ka manna.

¹⁰Nigdinog si Mosis to mgo otow to kara lunggunan no nigsinogow, kara sagboka to gomawan to tukbung din. Nabou lagboy ka Magboboot, woy nasasow si Mosis. ¹¹Nig-inso sikandin to Magboboot to “Manio to pigpa-aapan a nu to soini no igkawasow? Nokoy ka igkabou nu koddidi no inpatiang nu ka soini no koot-otawan koddidi? ¹²Sikoddidi buwa ka nigboot no ogko-otow ka soini no mgo otow? Sikoddidi buwa ka nig-anak kandan? Manio naan no inpasakopu nu sikandan to koddidi unawa to pogsakopu to taagtamong to bato, odyow no og-aapon ku sikandan to tano no inpangulibot nu to mgo kabuybudyagan dan? ¹³Hondo a ogpakakita to sapu no litos to soini tibon mgo otow? Ungud nigsisinogow sikandan no kagi ran to ‘Bogadyi koy to sapu!’ ¹⁴Kono a ogpakatiang to soini no koot-otawan to sagsagboka ku ro; kono kud ogkagoon ka kabogati ran. ¹⁵Ko soini ian ka oghimuon nu koddidi, madmarodyow pad nasi ko oghimatadyan a nu kuntoon, ko narago ka koddidi, no kono a nu ogbaybadyaran.”

¹⁶Nigkagi ka Magboboot ki Mosis to “Aapi a nu to kapituan to mgo budyag to Israil no noilaan nu no mgo igbudyag no og-aap to mgo otow. Aapa nu sikandan to Tukbung to Pogtangko, odyow no ogsasindog sikandan dio duma koikow. ¹⁷Oglogsad a no ogkagian ku sikoikow dio, woy ogpuruton ku ka Gimukud ku no duon to koikow woy songo ogbogadyan ku sikandan to sikan dod no Gimukud. Ogbulig sikandan koikow to pogtiang to tarabau nu to koot-otawan odyow no kono ka ogpasagsagboka to pogtiang. ¹⁸Nangoni nu ka koot-otawan to ‘Himpod kow no i-oog now koddidi ka mgo lawa now tongod to asoom no allow no ogpakakoon kow to sapu. Nakarinog ka Magboboot kaniu to pog-aaras to nigkagi kow to “Agad ko duon sapu no ogkoonon ta poron! Madmarodyow ka pog-ugpo ta dio to Ehiptu atag!” No kuntoon ogbogadyan kow to Magboboot to sapu woy ogkoonon now ian. ¹⁹Kono now ro ogkoonon ka sapu to sagboka ro no allow, woy ko daruwa no allow, woy ko lalima, ko sampuu, ko kawaan no allow, ²⁰ko konon taman to songo buwan pad! Ian ogkoonon now ka sapu taman to ogpowahan kow to sapu woy ogsun-ipan kow! Hoo su pig-iniugan now ka Magboboot no duon to taliwaro kaniu to pogkagi now to “Manio to no-ongkoran ta ka Ehiptu?””

²¹ Di nigtabak si Mosis duon to Magboboot to “Pitow ka no nigsasindog a no piglingutan a to hon-om no gatus no libu no otow woy nignangon ka to ‘Ogbogadyan ku sikandan to sapu no litos to sagboka no buwan!’ ²² Kono buwa ogpakalitos kandan agad ko ogpang-iowon ka pila no puntuk no karniru woy baka? Kono buwa ogpakalitos kandan agad ko ogko-utol ka tibon mgo isda no duon to dagat?”

²³ Nigtabak ka Magboboot ki Mosis to “Maupot buwa ka boad to Magboboot, naan nu? Pitow ka ro kuntoon ko ogpakatood ka innangon ku woy ko kono.”

²⁴ No sikan ian niglibuwas si Mosis woy pignangonan din ka mgo otow ko nokoy ka innangon to Magboboot. Piglimud din ka kapituan no mgo igbudyag to koot-otawan woy pigpasasindog din sikandan no niglingut to Tukbung. ²⁵ No niglogsad ka Magboboot pinabadyo to gapun no nig-aukoy ki Mosis, woy pigpurut to Magboboot ka Gimukud din no duon on ki Mosis woy songo pigsabukan din ka kapituan no mgo igbudyag to sikan dod no Gimukud. To poglogsad to Gimukud kandan, nigtatagna sikandan, di waro dan hutuka to duma no mgo allow. ²⁶ Di, daruwa to kapituan no ian si Ildad woy si Midad nigpalinggaat do to mgo pig-ugpaan dan. Nalagkos sikandan poron to kapituan no mgo igbudyag, di waro sikandan nakalibuwas pohondio to Tukbung. Di agad to sikan, pigsabukan sikandan to Gimukud to Magboboot, woy songo nigtatagna sikandan duon to pig-ugpaan to mgo otow. ²⁷ Duon sagboka no baubato no nigpallaguy no pignangonan din si Mosis to “Nigtatagna si Ildad woy si Midad dio to pig-ugpaan to mgo otow.” ²⁸ Nigkagi si Josue no anak ni Nun no ian ka taagbulig ni Mosis ligkat to baubato pad sikandin no kagi “Mosis, igbudyag ku, pahagtonga nu sikandan!” ²⁹ Di nigtabak si Mosis to “No-ima ka tongod koddi? Ovkoiniat a poron atag no ogkoubus ogtatagna ka koot-otawan to Magboboot, woy no ogpansabukan din sikandan tibo to Gimukud din!” ³⁰ No takas to sikan nigman-uli si Mosis woy ka mgo igbudyag to Israil dio to pig-ugpaan to mgo otow.

³¹ No kuntoon nigpa-aap ka Magboboot to kaamag no nigpaladyap to mgo pugu ligkat to dagat. Nono-uug ka mgo pugu no niglingut to pig-ugpaan to mgo otow no nokog-akob-akob taman to mgo daruwa no maniku ka karaoman ligkat to pig-ugpaan to mgo otow taman to ogkohipanowan ta to sagboka no allow no poghipanow to palibut. ³² To tibo to sikan no allow woy maukilom woy to pogkapawo pad

nigpamurut ka mgo otow to mgo pugu. Waro otow no maintok pad to 25 no saku ka noutol din. Pigpandampil dan ka mgo pugu no niglingut to pig-ugpaan dan. ³³Di to waro pad na-awo ka kulisap dan to pogkoon to sapu, woy to waro pad noubus ka sapu, nabou lagboy ka Magboboot kandan, woy piglogparan din sikandan to mokohinhinaat no dau. ³⁴No pighingaranan dan ka sikan no ugpaan to Kibrot Hataaba, no to kanta pad ‘lobong to ko-ima’, hoo su dio piglobong dan ka mgo otow no no-ima to loin no koonon. ³⁵Ligkat to Kibrot Hataaba nighipanow ka koot-otawan pohondio to Hasiro, woy dio sikandan nig-ugpo.

Nig-atu si Aaron woy si Miriam ki Mosis

12 ¹No kuntoon nigbunsud nig-aaras si Miriam woy si Aaron tongod ki Mosis su naka-asawa sikandin to boi no konon otow to Israil no otow to Kus atag. ²Songo nig-inso sikandan to “Ogkagi ro buwa ka Magboboot pinabadyo ki Mosis? Kono buwa songo ogkagi sikandin pinabadyo kanami?” No pigdinog to Magboboot ka innangon dan. ³(Si Mosis atag, nigpasaad-saad ladyun sikandin, waro duma no otow kai to ampow to tano no unawa kandin to pogpasaad-saad.) ⁴To waro moglianlian nigkagi ka Magboboot ki Mosis, ki Aaron woy ki Miriam to “Libuwas kow to Tukbung to Pogtango, sikaniu tatou ian.” No sikan ian niglibuwas sikandan tatou. ⁵No niglogsad ka Magboboot pinabadyo to suwoy to gapun woy nighasindog sikandin to gomawan to Tukbung woy pig-umow rin si Aaron woy si Miriam. To pogdani ran daruwa, ⁶nigkagi ka Magboboot to “Pamminog kow pa to mgo kinagian ku: Ko duon taagtagna ligkat to Magboboot no duon to taliwaro kaniu, ogtokowan ku sikandin pinabadyo to mgo kitoonon, woy ogkagian ku sikandin pinabadyo to mgo tagoinop. ⁷Di ko si Mosis atag, loin ka oghimuon ku; hoo su sikandin ka lagboy no matuwarong no otow taliwaro to lunggunan ku. ⁸Og-aukuy a ki Mosis no ogpatang-tangkooy koy, no matul-id ka pogkagi ku no kono no mgo hinoos no mgo kinagian; ogpakakita si Mosis to aung to Magboboot. Manio naan no waro kow mahallok to pog-aaras tongod to suguonon ku no si Mosis?”

⁹Nabou ka Magboboot kandan woy pig-ongkoran din sikandan. ¹⁰To pogkawoy to gapun ligkat to ampow to Tukbung, dio nigsasindog si Miriam no maputi on naan lagboy tongod to ibung. Nigpitow si Aaron kandin woy nakita rin no ibungon naan si Miriam ¹¹woy pignangonan din si Mosis to “Igbudyag ku, kono

nud isabuk duon to goinawa nu soini no sao noy koikow su waro koy mogdoromdom to marodyow to poghimu noy soini. ¹²Doka ogbaagara sikandin no inat unawa to bato no taan no namatoy to pogko-otow rin no oglibuwas to aanakan to inoy rin no namou on ka sapu din.”

¹³No sikan ian no nig-umow si Mosis to Magboboot no kagi rin “Magboboot, dorodyowa nu poron sikandin!”

¹⁴Nigtabak ka Magboboot ki Mosis to “Ko naugpa pig-loban sikandin to amoy rin dio to langlanguan din kono buwa no ogdoromdomon now no ogsamilian sikandin sood to papitu no allow? No, po-ugpaa sikandin to libuwasan to pig-ugpaan to mgo otow sood to papitu no allow, woy on ogpaka-uli sikandin.”

¹⁵No sikan ian no pigdogil dan si Miriam no nig-ugpo sikandin to libuwasan to pig-ugpaan to mgo otow sood to papitu no allow, woy waro nighipanow ka mgo otow taman to noko-uli sikandin. ¹⁶Takas to sikan, nigligkat ka mgo otow to Hasirot woy nig-ugpo sikandan to han-hanawan to Paran.

Ka Pogsobsob to Tano to Canaan

13 ¹Nigkagi ka Magboboot ki Mosis to ²“Pa-aap ka to mgo otow odyow to pogsobsob to tano to Canaan, ian ka tano no igbogoy ku to koot-otawan to Israil. Aam ka to sagboka no igbudyag to kara lunggunan to Israil.”

³No sikan ian sumao to sugu to Magboboot inpa-aap ni Mosis sikandan ligkat to han-hanawan to Paran. Tibo sikandan mgo igbudyag to koot-otawan to Israil. ⁴Soini ka mgo ngaran to inpa-aap no mgo otow; Ligkat to lunggunan ni Riubin, si Sammua no anak ni Sacur. ⁵Ligkat to lunggunan ni Simion, si Sapat no anak ni Hori. ⁶Ligkat to lunggunan ni Juda, si Kalib no anak ni Yipuni. ⁷Ligkat to lunggunan ni Isakar, si Yigal no anak ni Yosip. ⁸Ligkat to lunggunan ni Ipraim, si Hosia no anak ni Nun. ⁹Ligkat to lunggunan ni Binyamin, si Palti no anak ni Rapu. ¹⁰Ligkat to lunggunan ni Sibulun, si Gaddiil no anak ni Sodi. ¹¹Ligkat to lunggunan ni Manasi (no songo lunggunan ni Jose), si Gaddi no anak ni Susi. ¹²Ligkat to lunggunan ni Dan, si Ammiil no anak ni Gimali. ¹³Ligkat to lunggunan ni Asir, si Situr no anak ni Mikail. ¹⁴Ligkat to lunggunan ni Naptali, si Nabi no anak ni Bopsi. ¹⁵Ligkat to lunggunan ni Gad, si Guil no anak ni Maki. ¹⁶Sikan ian ka mgo ngaran to mgo otow no

inpa-aap ni Mosis odyow to pogsobsob to tano. (Pighingaranan ni Mosis ki Josue si Hosia no anak ni Nun.)

¹⁷To pogpa-aap ni Mosis kandan odyow to pogsobsob to tano to Canaan pignangonan din sikandan to “Hondio kow to Nigib woy ogparagas kow pohondio to mgo bubungan. ¹⁸Pitowa now ko mo-omonu ka tano woy pitowa now to mgo otow no nig-ugpo duon ko mabuut woy ko maotoy, ko moon-ing sikandan ko manalimboka ro. ¹⁹Mo-omonu ka tano no pig-ugpaan dan? Marodyow woy ko maroot buwa? Mo-omonu ka mgo ugpaan dan no mgo lunsud? Nalingkusan to aad no batu woy ko waro? ²⁰Mo-omonu ka tano to mgo kamot? Maambog buwa woy ko magaso? Duon buwa mgo kadyu ko waro? Poomot kow no duon ogka-aap now no mgo bogas ko og-uli kow kai.” (Ian ka buwan to an-anadyan no noinug no mgo ubas poghondio dan.)

²¹No sikan ian no nigtakorog sikandan no nigsobsob sikandan to tano ligkat to Han-hanawan to Sin taman to Rihob pohondio to Gomawan to Hamat. ²²Nigtakorog sikandan no nigbadyo to Nigib taman to Hibron no ian ka ugpaan ni Ahiman, ni Sisay woy ni Talmay no mgo kapunganan ni Anak. (Woy on ikapos-ok ka Zoan no taan lagboy no ugpaan to Ehiptu ko napos-ok on to papitu no tuid ka Hibron.) ²³To poglopow ran to Aug to Iskol, nig-abat sikandan to sagboka no sugpang to ubas no duon sagboka no umpung to ubas. Piglounng to daruwa kandan ka sikan no mgo ubas duma to mgo granada woy mgo igira no napurut dan. ²⁴Pighingaranan dan ka sikan no aug no Aug to Iskol no to kanta pad ‘Umpung’ tongod to umpung to ubas no pigpurut to mgo otow to Israil dio.

²⁵Takas to kohop-atan no allow nig-uli sikandan ligkat to pogsobsob dan to tano.

Nignangon-nangon Ka mgo Nigsobsob ko Nokoy ka Nabadyaan Dan

²⁶Niglibong sikandan dio ki Mosis woy ki Aaron woy to tibon koot-otawan to Israil duon to Kadis to Han-hanawan to Paran. Dio to tangkaan to tibon mgo otow nignangon-nangon sikandan ko nokoy ka nabadyaan dan woy inpapitow ran ka mgo bogas no napurut dan. ²⁷Soini ka ingkagi ran ki Mosis kagi “Nighondio koy to tano no innangon nu kanami, woy maugot ian no ogpuunan to gatas woy tonob no dakol! Soini ian ka mgo bogas no no-utol noy dio. ²⁸Di mabogbog ka mgo otow no nig-ugpo dio. Dagdakol ka mgo lunsud

dan woy makopal ka mgo aad no nakalingkus to mgo lunsud. Woy nokoy pad nakita noy ka mgo kapunungan ni Anak duon. ²⁹ Ka nig-ugpo to Nigib ian ka mgo kapunungan ni Amalik, ka dio to mgo bubungan ian ka mgo kapunungan ni Hit, ni Yibus woy ni Amor, woy ka mgo kapunungan ni Canaan ian ka nig-ugpo to marani to dagat woy dio to ilis to Jordan no woig.”

³⁰ No inpahagtong ni Kalib ka mgo otow dio to tangkaan ni Mosis no nigkagi sikandin to “Oghondio ki porom no ogtagtuunon ta ka tano su ogkohimu ta ian.”

³¹ Di ka duma no mgo otow no nigsobsob to tano duma kandin nigkagi to “Kono ta ogkagoon to pogmangadyow to sikan no mgo otow; mabbuut pad sikandan kanta.” ³² No sikan ian nigpatangkap sikandan to maroot no nangnangonon duon to mgo otow to Israil tongod to tano no pigsobsoban dan. Kagi ran to “Ogpang-aboong ka tano no pighondiaan noy to mgo otow no og-ugpo dio. Dagdakol ka tibon mgo otow no tag-inugpo dio. ³³ Nakita noy ka mgo pagpagamadyan no otow^adio (hoo su puun to mgo pagpagamadyan no otow ka mgo kapunungan ni Anak.) To pogpitow noy inat mgo taangas koy ro no maintok, woy songo sikan ka pogpitow ran kanami.”

Nig-atu ka Mgo Otow

14 ¹ To sikan no maukilom nigmansinogow to maagbot ka tibon mgo otow to koot-otawan. ² Nig-aaras ka tibon mgo otow to Israil tongod ki Mosis woy ki Aaron woy pignangonan sikandan to tibon koot-otawan to “Marodyow pad porom ko nammatoy koy dio to Ehiptu! Songo marodyow ko nammatoy ki kai poron to han-hanawan! ³ Manio to pig-aap koy to Magboboot kai to soini no tano odyow ro no ogkohimatadyan koy pinabadyo to kampilan? Ogkarakop ka mgo asawa woy mgo anak noy. Marodyow pad nasi buwa ko ogman-libong ki to Ehiptu?” ⁴ Woy nigmanang-nangonoy sikandan to “Og-aam ki to otow no og-aap kanta no ogmanlibong kinow to Ehiptu.”

⁵ No niglangkob si Mosis woy si Aaron no nigpakoid-u to Magboboot dio to tangkaan to tibon koot-otawan to Israil no nalimud dio.

^a13:33 Pagpagamadyan no otow: Nipilim to Hibriu. Pitowa now ka Genesis 6:4

⁶Daruwa to sikan no nigsobsob to tano ian si Josue no anak ni Nun woy si Kalib no anak ni Yipuni woy pighigbit^bdan daruwa ka mgo kinabo dan ⁷no nigkagi sikandan duon to tibon koot-otawan to Israil to “Marodyow lagboy ka tano no naligaran noy to pogsobsob noy. ⁸Ko ogkarago ka Magboboot kanta og-aapon ki rin to sikan no tano no ian ogpuunan to gatas woy tonob no dakol, woy igbogoy rin kanta sikan. ⁹Di dokow og-atu to Magboboot. Woy dokow ogkahallok to mgo otow to sikan no tano su unawa't og-aboongon ta ro sikandan. Warad on ogkaasag kandan, di sikanta atag pigdumaan ki to Magboboot. Dokow ogkahallok kandan.”

¹⁰Di nigbabantaan ka tibon koot-otawan to pogdorogpak to mgo batu duon to kandan. No, niglogsad ka kabantug to Magboboot duon to Tukbung to Pogtangko dio to pogpitow to tibon mgo otow to Israil. ¹¹Nigkagi ka Magboboot ki Mosis to “Monu kaugoy no ogsamilion a to soini no mgo otow? Monu kaugoy no ogligal sikandan to pogtuu koddi agad takas to tibon mgo ogko-in-inuan no tuus no pighimu ku taliwaro kandan? ¹²No kuntoon ogpa-aapan ku sikandan to mokohinhinaat no dau no og-awoon ku sikandan, di oghimuon ku ka mgo tipouri nu no songo koot-otawan no mabogbog woy mabantug pad kandan.”

¹³Nigtabak si Mosis duon to Magboboot no kagi “No, ogdinog ka mgo otow to Ehiptu to sikan! Pinabadyo to kabogbogan nu pig-aap nud ka soini no koot-otawan nu ligkat to taliwaro dan. ¹⁴Woy ognangonan dan ka mgo tag-inugpo to soini no tano tongod to sikan. Nakarinog on sikandan no pigdumaan nu, Magboboot, ka soini no koot-otawan, woy nakita ka langlanguan nu woy no nig-ampow kandan ka gaapun nu no nighun-a ka kandan pinabadyo to suwoy no gaapun to allow woy pinabadyo to suwoy no hapuy to maukilom. ¹⁵Ko og-ubuson nu no ogpanghimatadyan nu sikandan to sagboka ro no allow, ognangonnangon ka mgo koot-otawan no nakarinog tongod koikow no kagi ¹⁶‘Waro naka-adyun naan ka Magboboot to pog-aap to soini no koot-otawan duon to tano no inpangulibot din kandan, no sikan ian no pigpanghimatadyan din sikandan duon to han-hanawan.’ ¹⁷No kuntoon ipakita nu ka kabogbogan nu, iing to innangon nu nokani: ¹⁸‘Mananoy ogkabou ka Magboboot, woy dakol lagboy ka goinawa rin no mopo-iguon to mgo sao woy mgo pog-atu. Di kono din ogbaagaron ka nakasao; oglogparan din taman

^b14:6 Nighigbit: pighimu ran sikan odyow to pogpakita no masakit lagboy ka goinawa ran.

to igkatou woy ko igkohop-at no kapunganan ka mgo anak to mgo amoy no nakasao.^c ¹⁹ Sumao to dakol no goinawa nu ipo-igu nu ka sao to soini no koot-otawan unawa to pogpo-igu nu kandan ligkat to allow no nigpuun sikandan to Ehiptu taman kuntoon.”

²⁰ Nigtabak ka Magboboot to “Inpo-igu kud on, unawa to inpamudyu nu. ²¹ Di ogligdongan ku no unawa to manokal a no naponu ka tibon kalibutan to kabantug ku no Magboboot a, ²² waro agad sagboka to mgo otow no nakakita to kabantug ku woy to mgo mokohinhinaat no tuus no pighimu ku duon to Ehiptu woy to han-hanawan, no nigligal sikandan to pogpa-agad-agad koddi to kasampuu ²³ waro agad sagboka kandan ka ogpakakita to tano no inpangulibot ku to mgo kabuybudyagan dan. Waro otow no nigsamili koddi ka ogpakakita to sikan. ²⁴ Di tongod su loin ka goinawa ni Kalib no ig-ubus din ka goinawa rin to pog-gaat koddi, og-aapon ku sikandin to tano no inlouy rin woy ogpakatagtuun ka kandin no mgo tipouri to sikan. ²⁵ No kuntoon, tongod su nig-ugpo ka mgo kapunganan ni Amalik woy ni Canaan duon to mgo aug, asoom no allow ogliku kow no oglibong kow to han-hanawan to daan no pohondio to Malaab no Dagat.”

²⁶ Nigkagi pad ka Magboboot ki Mosis woy ki Aaron: ²⁷ “Monu kaugoy no og-aaras soini no maroot no koot-otawan tongod koddi? Nakarinog a to ig-aaras to soini no mgo kapunganan ni Israil no ungod og-aaras. ²⁸ No nangoni now sikandan to “Unawa to manokal a, kagi to Magboboot, oghimuon ku ka mgo innangon now no narinog ku: ²⁹ Ogangkammatooy kow kai to soini no han-hanawan: kara sagboka kaniu no nakaligad to kawaan no tuid ka kabudyagi rin no nalagkos to pogsool no naka-aaras tongod koddi. ³⁰ Waro agad sagboka kaniu ka ogpakasood to tano no inpangulibot ku no og-ugpaan now poron pinabadyo to inkawoy no boad ku, ko konon si Kalib no anak ni Yipuni woy si Josue no anak ni Nun do. ³¹ Di to sikan no mgo anak now no naan now ogka-agow, sikandan atag ka ogpaka-ugpo to marodyow duon to tano no pigsamilian now. ³² Di sikaniu, ogkangkammatooy kow to soini no han-hanawan. ³³ Ogbabantoy ka mgo anak now to mgo karniru kai sood to kohop-atan no tuid, no ogkabaybadyaran sikandan tongod to kaniu no pog-atu, taman to ogkoubus ogkalobong ka mgo lawa now kai to han-hanawan. ³⁴ Kohop-atan no tuid ian ka igkobaybadyari now tongod to mgo sao now, sagboka no tuid to kara sagboka to

^c14:18 Pitow kow to Exodu 34:6-7

kohop-atan no allow to pogsobsob now to tano, woy ogpakagoram kow to pog-atu ku kaniu.’ ³⁵ Sikoddi no Magboboot ian ka nigkagi, woy ogligdongan ku no oghimuon ku soini tibo to soini no maroot no koot-otawan no nasagboka to pog-atu koddi. Kai ro taman ka mgo ukul dan kai to soini no han-hanawan.”

^{36–37} No sikan ian piglamposan to Magboboot ka mgo otow no inpa-aap ni Mosis odyow to pogsobsob to tano no ian ka mgo otow no ian binunsuran to pog-aaras to tibon koot-otawan pinabadyo to pogpatangkap to maroot no kinagian tongod to tano. Pigbarasan sikandan to Magboboot no nammatoy sikandan to mokohinhinaat no darau to tangkaan to Magboboot. ³⁸ To mgo otow no nigsobsob to tano, si Josue no anak ni Nun woy Kalib no anak ni Yipuni naan do ka nagaat no manokal.

³⁹ To pognangon ni Mosis soini tibo duon to mgo otow to Israil, dakol ka pogpandaawit dan. ⁴⁰ Masoom pad to pogkapawo nigtakorog sikandan pohondio to mgo bubungan. Nigkagi sikandan to “Nakasao ki. Ogtakorog ki pohondio to tano no inpangulibot to Magboboot.”

⁴¹ Di nigkagi si Mosis to “Manio to nig-atu kow to sugu to Magboboot? Kono kow ogpakatood! ⁴² Dokow ogtakorog su waro nigduma ka Magboboot kaniu. Ogkarooog kow to mgo usig now, ⁴³ su ogpakatangko kow ian to mgo kapunganan ni Amalik woy ni Canaan dio. Kono ogduma ka Magboboot kaniu su nig-iniug kow kandin, woy ogkohimatadyan kow pinabadyo to kampilan.”

⁴⁴ Di agad to sikan, tongod to pogparakol-dakol dan, nigparagas sikandan nigtakorog pohondio to mgo bubungan, agad to waro nigduma si Mosis, woy waro na-aap ka sooranen to Kasabutan to Magboboot ligkat to pig-ugpaan to mgo otow. ⁴⁵ No nigtupang ka mgo kapunganan ni Amalik woy ni Canaan no nig-ugpo to sikan no tano, woy pig-atuan dan ka mgo otow to Israil no nig-ituos pohondio to Horma.

Pighimatadyan ka Otow no Nigtarabau to Sabado

15 ³² Tagood to nig-ugpo ka mgo kapunganan ni Israil to han-hanawan, duon otow no nakitaan no nigpamurut to igtotomog to allow to poghimooy. ³³ Pig-aap sikandin to mgo otow no nakakita kandin duon to ki Mosis, ki Aaron woy to tibon koot-otawan, ³⁴ woy pigbantadyan dan pad sikandin, su waro pad sikandan mataga ko nokoy ka oghimuon dan kandin.

³⁵No niggagi ka Magboboot ki Mosis to “Awos no ogkamatoy ka otow. Ogdorogpakon sikandin to batu to tibon koot-otawan to libuwasan to pig-ugpaan to mgo otow.” ³⁶No sikan ian no pig-aap sikandin to libuwasan to pig-ugpaan to mgo otow, woy pigdorogpak sikandin to batu to tibon koot-otawan taman to namatoy sikandin, sumao to insugu to Magboboot ki Mosis.

Nig-atu si Kora woy mgo Duma rin

16 ¹No kuntoon duon hop-at no otow no si Kora no anak ni Is-har no kapunganan ni Livi, woy si Datan woy si Abiram no mgo anak ni Iliab woy si On no anak ni Pilit no mgo kapunganan ni Riubin. Nigparakol-dakol sikandan ²woy nig-atu sikandan ki Mosis. Duma kandan hop-at, duon 250 no mgo otow to Israil no mgo na-ngaranan no mgo in-aam no igbudyag to koot-otawan. ³Nasagboka sikandan to pogdani ki Mosis woy ki Aaron no kagi ran to “Naabanan kow on! In-oog ka tibon koot-otawan, kara sagboka kandan, woy nigduma ka Magboboot kandan. Manio naan no nigparakol-dakol kow no nigpalabow kow to koot-otawan to Magboboot?”

⁴To pogdinog ni Mosis to soini niglangkob sikandin to pogpanubad. ⁵No niggagi sikandin duon ki Kora woy to mgo sakup din to “Asoom to masoom ipapitow to Magboboot ko hontow ka kandin no otow woy ko hontow ka in-oog din. Ogparanion din ka sikan no otow. Sikan do no otow no og-aamon din ian ka ogdani kandin. ⁶No soini ka oghimuon now; sikoikow, Kora, woy ka tibon mgo sakup nu ogpurut kow to mgo tutunganan to palina ⁷woy asoom no allow ogsabukan now to hapuy woy palina duon to tangkaan to Magboboot. Ko hontow ka og-aamon no otow to Magboboot ian ka in-oog din. Sikaniu no mgo kapunganan ni Livi ian ka naabanan on!”

⁸Songo pignangonan ni Mosis si Kora to “No pamminog kow no mgo kapunganan ni Livi! ⁹Kulang pad buwa to pogdoromdom now no pigsapin-sapin kow to Magboboot ligkat to duma no mgo otow to koot-otawan to Israil, no pigdanian din sikaniu odyow no ogtarabau kow to Tukbung to Magboboot no ogtangko kow to tibon koot-otawan no oggaaton now sikandan? ¹⁰Pigdanian kow to Magboboot duma to tibon mgo duma now no mgo otow ni Livi, di kuntoon og-agawon now pad poron ka pogkataagpanubad. ¹¹Ka Magboboot ian ka pig-atuan now no nasagboka kow to mgo sakup nu. Hontow si Aaron no sikandin do ka og-aarasan now?”

¹²No inpo-umow ni Mosis si Datan woy si Abiram no mgo anak ni Iliab. Di nigtugun sikandan to “Kono koy oghondio! ¹³Kulang pad buwa koikow no pig-aap koy nu ligkat to tano no tu-augan to gatas woy tonob odyow to poghimatoy kanami to han-hanawan? No kuntoon ogkoiniat ka pad to pogbootboot kanami? ¹⁴Nokoy pad, no waro koy nu aapa to tano no tu-augan to gatas woy tonob, woy waro koy nu bogadyi to mgo kamot woy pinamua-an to ubas no ogkatagtuun noy. Oglugiton nu pad buwa ka mgo mata to soini mgo otow? Kono koy oghondio ian!”

¹⁵No nabou lagboy si Mosis, woy pignangonan din ka Magboboot to “Dokad ogtinawaa ka igtaruwoy ran koikow. Waro a nigpurut to agad asnu ligkat kandan, woy waro a nakasao to agad hontow kandan.”

¹⁶Nignangon si Mosis ki Kora to “Ogtangko kow to Magboboot asoom no allow, sikoikow woy ka mgo sakup nu woy si Aaron. ¹⁷Kara sagboka kaniu ogpurut to tutunganan din to palina woy ogsooran din pad to palina -250 tibo ka mgo tutunganan to palina -woy ogtangko kow to Magboboot. Songo ogtangko kow ni Aaron to Magboboot no og-aap to tutunganan to palina.”

¹⁸No sikan ian to pogkapawo nigpurut kara otow kandan to tutunganan din to palina, woy pigsooran din to hapuy woy palina no nigludyud ki Mosis woy ki Aaron no nighasindog to gomawan to Tukbung to Pogtangko. ¹⁹To poglimud ni Kora to mgo sakup din no nasagboka to pog-atu ki Mosis woy ki Aaron to gomawan to Tukbung to Pogtangko, niglogsad ka kabantug to Magboboot to tangkaan to tibon koot-otawan. ²⁰Nigkagi ka Magboboot ki Mosis woy ki Aaron to, ²¹“Pamariu kow to soini no koot-otawan odyow no ogpanghimatadyan ku sikandan to kuntoon do ian.”

²²Di niglangkob si Mosis woy si Aaron duon to tano no nigpakoid-u no nig-umow to “Magboboot no Igbudyag to tibon mgo gimukud to mgo otow, ogkabou ka buwa to tibon koot-otawan tongod do to sao to sagboka ro no otow?”

²³No nigkagi ka Magboboot ki Mosis to ²⁴“Nangoni nu ka koot-otawan to ‘Pamariu kow to mgo tukbung ni Kora, ni Datan woy ni Abiram.’”

²⁵No nig-onow si Mosis woy nighondio sikandin ki Datan woy ki Abiram woy nigsundul kandin ka tibon mgo igbudyag to Israil. ²⁶Nigtuario sikandin to tibon koot-otawan to “Ituos kow ligkat to mgo tukbung to soini no mgo maddoot no mgo otow! Dokow

ogsamsam to agad nokoy no kandan odyow kono kow ogpakalagkos to pog-awo ku kandan tongod to mgo sao dan.”

²⁷No sikan ian nigpamariu ka mgo otow to mgo tukbung ni Kora, ni Datan woy ni Abiram. Niglibuwas sikandan si Datan woy si Abiram no nigpo-onong-onong to mgo gomawan to mgo tukbung dan duma to mgo asawa ran, mgo anak dan no dagdakol woy mallintok pad. ²⁸No nigkagi si Mosis to “Soini ka indanan now no pigpa-aap a to Magboboot odyow to poghimu to soini tibo no konon sikoddi do ka nigboot: ²⁹Ko ogkamatoy soini no mgo otow to kamatadyon no ogkabadyaan to tibon duma no mgo otow, no, waro a naan ipa-aap to Magboboot. ³⁰Di ko igpapatow to Magboboot ka iam no ogkabol-boongan no ogbogtak ka tano no og-aboong kandan ilagkos to tibo no kandan, no manokal pad sikandan ogkalobong, no sikan ian ogkataga kow no nakasamili ka soini no mgo otow to Magboboot.”

³¹To iam pad nigtakas si Mosis to pogkagi to soini, nigbogtak ka tano diraom kandan ³²woy pigginganga to tano ka bobo din no nig-aboong kandan, duma to mgo lunggunan dan woy to tibon mgo otow ni Kora duma to mgo kaaglagan dan. ³³Manokal pad sikandan no nighondio to lobong duma to tibo no kandan, woy nigkimut ka tano no nammatoy sikandan no warad on to koot-otawan. ³⁴To pogngangang dan, nigpanlaguy ka mgo otow to Israil no marani kandan no nigpangiak to “Songo ogka-aboong ki to tano!”

³⁵Songo niglibuwas ka hapuy ligkat to Magboboot no nighimatoy to 250 no mgo otow no nigtutung to palina.

³⁶Nigkagi ka Magboboot ki Mosis to ³⁷“Nangoni nu si Eliasar no anak ni Aaron no taagpanubad no ogpuruton din ka mgo tutunganan to palina ligkat to mgo baga no nagaat, woy idogpak now ka mgo abu to madmariu, su in-oog on ka mgo tutunganan to palina. ³⁸Puruta nu ian ka mgo tutunganan to palina to mgo otow no nammatoy tongod to sao dan, woy ogsalsalan now sikan odyow to poghimu to akob to panubaranan, hoo su intaruwoy sikan to Magboboot woy no in-oog. Ogkohimu sikan no tuus to mgo otow to Israil.”

³⁹No sikan ian piglimud ni Eliasar no taagpanubad ka brunsi no mgo tutunganan to palina no pig-aap to mgo otow no nasilaban on, woy pigsalsal din odyow to poghimu to akob to panubaranan, ⁴⁰sumao to innangon to Magboboot kandin pinabadyo ki Mosis. Nohimu soini no tuus to mgo otow to Israil no waro otow no kono'n kapunganan ni Aaron ka ogdani to Magboboot no ogtutung to palina

odyow kono ogkamatoy sikandin unawa ki Kora woy to mgo sakup din.

⁴¹ To pogkapawo nig-aaras ka tibon koot-otawan to Israil tongod ki Mosis woy ki Aaron no kagi ran “Pighimatadyan now ka mgo otow to Magboboot.” ⁴² Di to poglimudlimud to koot-otawan to pog-atu ran ki Mosis woy ki Aaron, nigpitow sikandan pohondio to Tukbung to Pogtangko woy inogo niglogsad ka saagapun no nigtongos to sikan, woy nigpakita ka Magboboot to kabantug din. ⁴³ No nighondio si Mosis woy si Aaron to tangkaan to Tukbung to Pogtangko, ⁴⁴ woy nigkagi ka Magboboot ki Mosis to ⁴⁵ “Pamariu kow to soini no koot-otawan odyow no ogpanghimatadyan ku sikandan to kuntoon do.” Woy niglangkob sikandan to tano. ⁴⁶ No nigkagi si Mosis ki Aaron to “Puruta nu ka tutunganan nu to palina woy sabuki nu to palina duma to hapuy puun to panubaranan, woy agpas ka oghondio to mgo otow odyow to pogpo-uli kandan to Magboboot. Niglibuwas on ka kabou to Magboboot woy nigbunsud on ka mokohinhinaat no dau.”

⁴⁷ No pighimu ni Aaron ka innangon ni Mosis, woy nigpallaguy sikandin to taliwaro to koot-otawan no nalimud. Nabunsuran on ka mokohinhinaat no dau to kandan di nigtaruwoy si Aaron to palina duon to Magboboot no nigpo-uli kandan. ⁴⁸ Nigpo-onong-onong si Aaron no nigpataliwaro to mgo manokal woy to mgo nammatoy on, woy nigsagdok ka mokohinhinaat no dau. ⁴⁹ Di nammatoy on ka 14,700 no otow tongod to dau, timul pad to mgo nammatoy tongod ki Kora. ⁵⁰ No niglibong si Aaron ki Mosis to gomawan to Tukbung to Pogtangko su nighagtong on ka mokohinhinaat no dau.

Nigtunas ka Tukod ni Aaron

17 ¹ Nigkagi ka Magboboot ki Mosis to ² “Nangoni nu ka mgo otow to Israil woy puruta nu ka sampuu woy daruwa no mgo tukod ligkat kandan; sagboka no tukod to kara igbudyag to sampuu woy daruwa no lunggunan to Israil. Ipatik nu duon to mgo tukod ka ngaran to tagtuun to tukod. ³ Dio to tukod to lunggunan ni Livi ipatik nu ka ngaran ni Aaron, hoo su duon sagboka no tukod to igbudyag to kara lunggunan no kapunganan ni Israil. ⁴ Isabuk nu ka mgo tukod to sood to Tukbung to Pogtangko to tangkaan to Sooranan to Kasabutan no ian ka tomuanan ku koikow. ⁵ Ogtunas ka tukod to otow no og-aamon ku, woy ogtamporon ku ka soini no pog-aaras ladyun to mgo otow to Israil tongod koikow.”

⁶No niggagi si Mosis duon to mgo otow to Israil, woy pigbogadyan sikandin to mgo igbudyag dan to sampuu woy daruwa no tukod; sagboka no tukod to kara igbudyag to lunggunan no inlagkos ka tukod ni Aaron. ⁷Insabuk ni Mosis ka mgo tukod duon to tangkaan to Magboboot to Tukbung to Kasabutan. ⁸To pogkapawo nigsood si Mosis to Tukbung to Kasabutan woy nakita rin ka tukod ni Aaron no tuus to lunggunan ni Livi. Waro do nigtunas soini ko konon nigtunas, nigbulak woy nigpambogas on to mgo almindras! ⁹Inlibuwas ni Mosis ka mgo tukod ligkat to tangkaan to Magboboot duon to mgo otow to Israil. Pigmolmoogan dan ka mgo tukod woy pigpurut to kara sagboka kandan ka kandin do no tukod.

¹⁰Nignangon ka Magboboot ki Mosis to “Ilibong nu ka tukod ni Aaron duon to tangkaan to Kasabutan, odyow no ogkagaat no tuus to mgo otow no og-atu. Ogkatampod on ka kandan no pog-aaras tongod koddii, odyow no kono ogkammatoy sikandan.” ¹¹Pighimu ian ni Mosis ka insugu to Magboboot.

¹²Nignangon ka mgo otow to Israil duon ki Mosis to “Ogkammatoy koy! Wa ki, wa ki tibo ian! ¹³Agad hontow no ogdani ro to tukbung to Magboboot ogkammatoy. Ogekoubus ki buwa ogkammatoy?”

Woig Ligkat to Batu

20 ¹To an-anadyan no buwan to tuid, niglopow ka tibon koot-otawan to Israil dio to Han-hanawan to Sin, woy nig-ugpo sikandan to Kadis. To dio sikandan, namatoy si Miriam woy inlobong sikandin. ²No kuntoon waro woig no ogko-inom to koot-otawan, woy niglimud-limud ka mgo otow no nig-atu ki Mosis woy ki Aaron. ³Nig-ogot sikandan ki Mosis no kagi ran “Madmarodyow nasi porom ko nammatoy ki duma to mgo suod ta no nammatoy to tangkaan to Magboboot! ⁴Manio to pig-aap nu ka koot-otawan to Magboboot kai to soini no han-hanawan odyow ro no ogkammatoy koy duma to mgo adyam noy kai? ⁵Manio to pig-aap koy nu ligkat to Ehiptu pohondii to soini no dorooti no ugpaan? Waro bogas kai, waro mgo pinamua no mgo igira, mgo ubas woy mgo granada. Woy nokoy pad, waro woig no ogko-inom ta!”

⁶Pig-ongkoran ni Mosis woy ni Aaron ka nalimud no mgo otow woy nighondio sikandan to gomawan to Tukbung to Pogtangko woy niglangkob sikandan duon to tano, woy inpakita to Magboboot ka kabantug din kandan dio. ⁷Niggagi ka Magboboot ki Mosis to ⁸“Puruta nu ka tukod, woy limura now ni Aaron no suod nu ka tibon

koot-otawan. Kagii nu soodyo batu to tangkaan to pogpitow ran woy ogtu-aug ka woig ligkat to sikan. Ipalibuwas nu ka woig ligkat to batu woy ogpaka-inom ka koot-otawan duma to mgo adyam dan.”

⁹No pigpurut ni Mosis ka tukod ligkat to tangkaan to Magboboot unawa to insugu din kandin. ¹⁰Inpalimud ni Mosis woy ni Aaron ka koot-otawan to tangkaan to batu, di nigkagi si Mosis kandan to “Pamminogi a now no mgo taag-atu kow no mgo otow. Ogkapogos koy buwa to pogpurut kaniu to woig ligkat to soini no batu?”

¹¹No inkawoy ni Mosis ka boad din woy kararuwa rin lamposi ka batu pinabadyo to tukod. Nigtu-aug ka mabolbol no woig ligkat to batu woy nig-inom ka mgo otow woy mgo adyam dan. ¹²Di nigkagi ka Magboboot ki Mosis woy ki Aaron to “Waro makalitos ka pogtuu now no waro a now ilaa no in-oog lagboy to tangkaan to pogpitow to mgo otow to Israil, woy tongod to sikan kono kow on ogpaka-aap to soini no koot-otawan pohondio to tano no igbogoy ku kandan.”

¹³Sikan ka pighingaranan no mgo woig to Miriba^dsu nig-atu ka mgo otow to Israil to Magboboot dio woy dio nigpo-ila ka Magboboot no in-oog lagboy to taliwaro kandan.

Nig-atu ka mgo Otow to Edom duon to mgo Otow to Israil

¹⁴Nigpa-aap si Mosis to mgo otow ligkat to Kadis odyow to pognangon to hari to Edom to “Soini ka kinagian to suod nu no si Israil: Nataga ka to tibon mgo ingkabaybadyari no naligaran noy. ¹⁵Nighondio ka mgo kabuybudyagan noy to Ehiptu woy dio koy nig-ugpo to moon-ing no mgo tuid. Piglo-loigan koy woy ka mgo amoy noy to mgo otow to Ehiptu, ¹⁶di to pogpangiak noy duon to Magboboot, nigpamminog sikandin to pog-umow noy, woy nigpa-aap sikandin to diwata rin no nig-angoy kanami ligkat to Ehiptu. No, kuntoon, kai koy on to Kadis no songo lunsud to oatan to tano nu. ¹⁷Ogpamudyu koy ro koikow no ogligad koy ro to tano nu. Kono koy ogbadyo to mgo kamot now woy ko mgo pinamua-an now to ubas, woy kono koy og-inum to woig to mgo sakuganan now. Oghipanow koy ro duon to daan to hari no kono koy ogsuwoy pohondio to kawatan woy ko pohondio to gibang taman to ogkaligaran noy on ka tibon tano nu.”

¹⁸Di nigtabak si Edom to “Kono ka ogpakabadyo kai. Ko og-ol-oog ka to pogligad, oglibuwas koy no og-atuan noy sikaniu pinabadyo to kampilan.”

^d20:13 Miriba: Ogpasabut to ‘in-apuay’ to Hibriu no kinagian.

¹⁹ Nigtabak ka mgo otow to Israil to “Oghipanow koy ro to dakol no daan, woy ko duon otow woy ko adyand noy no og-inum to woig now, ogbadyaran noy ian. Ogkoiniat koy ro to pogligad no oghipanow ro. Waro loin no tuud noy.”

²⁰ Nighutuk sikandan to pogtabak “Kono kow ogpakaligad kai.” No niglibuwas si Edom no nig-atu kandan pinabadyo to dakol no puntuk to mgo mabuut no bagani.

²¹ No tongod su nigligal si Edom to pogpaligad kandan to tano dan, nigliku ka mgo otow to Israil.

Pogkamatoy ni Aaron

²² Nighipanow ka tibon koot-otawan to Israil ligkat to Kadis woy niglopow sikandan to Bubungan to Hor. ²³ To Bubungan to Hor no marani to oatan to Edom, nigkagi ka Magboboot ki Mosis woy ki Aaron to ²⁴ “Ogpaka-agpot on si Aaron to mgo kabuybudyagan din. Kono ogpakasood sikandin to tano no igbogoy ku to mgo otow to Israil, hoo su nig-atu kow daruwa to sugu ku dio to mgo woig to Miriba. ²⁵ Umowa nu si Aaron woy ka anak din no si Iliasar woy aapa nu sikandan dio to ampow to bubungan to Hor. ²⁶ Luunga nu ka mgo kinabo ni Aaron woy isau-ub nu ki Iliasar no anak din, hoo su ogpaka-agpot si Aaron to mgo kabuybudyagan din su ogkamatoy sikandin dio.”

²⁷ Pigtuman ni Mosis ka insugu to Magboboot; nigtakorog sikandan to Bubungan to Hor to pogpitow to tibon koot-otawan. ²⁸ Pigluung ni Mosis ka mgo kinabo ni Aaron, woy insau-ub din to anak din no si Iliasar. No, namatoy si Aaron dio to ampow to bubungan. No niglogsad si Mosis woy si Iliasar ligkat to ampow to bubungan, ²⁹ woy to nakarinog on ka tibon koot-otawan no namatoy on naan si Aaron, nigpandaawit ka tibon lunggunan ni Israil sood to 30 no allow.

Ka Uod no Brunsi

21 ⁴ Nighipanow ka mgo otow ligkat to Bubungan to Hor to daan pohondio to Malaab no Dagat odyow to poglibut to Edom. Di no-opus on ka goinawa to mgo otow to poghipanow ran; ⁵ woy nig-aaras sikandan tongod to Magboboot woy tongod ki Mosis no kagi ran “Manio to pig-aap koy nu ligkat to Ehiptu odyow no ogkamatoy koy kai to han-hanawan? Waro pan! Waro woig! Woy napoan koy on to soini no koonon noy no waro nanam!”

⁶No nigpa-aap ka Magboboot to mgo uod no ogpakahilu taliwaro kandan. Nigpangagat ka mgo uod to mgo otow, woy moon-ing ka mgo otow to Israil no nammatoy. ⁷No nigdani ka mgo otow ki Mosis no kagi ran “Nakasao koy to niggagi koy no nig-atu to Magboboot woy nig-atu to koykow. Panubad ka duon to Magboboot odyow no og-awoon din ka soini no mgo uod.” No nigpanubad si Mosis tongod to mgo otow. ⁸No niggagi ka Magboboot ki Mosis to “Himu ka to uod woy ikawoy nu to sagboka no suwoy; agad hontow no ogkakagat to uod ko ogpitow sikandin to sikan kono sikandin ogkamatoy.”

⁹No nighimu si Mosis to uod no brunsi, woy inkawoy rin to sagboka no suwoy. No ko duon otow no nakagat to uod, nigpitow sikandin to uod no brunsi woy nigpalingaat sikandin no manokal.

Ka mgo Lukos to Israil woy ka mgo Boi to Moab

25 ¹To nig-ugpo ka mgo otow to Israil duon to Sitim, nigbunsud ka mgo lukos to pogpanghilabot to mgo boi no matig Moab, ²woy pighinggat sikandan to mgo boi to pog-agpot to pogpanubad duon to kandan no mgo tinuuhan. Nigkokoon woy nig-unduk ka mgo otow to tangkaan to sikan no mgo tinuuhan. ³No sikan ian no nig-agpot ka mgo otow to Israil to pogsadyo to Baal^eto Pior. Woy nigmoinit lagboy ka goinawa to Magboboot tongod kandan.

⁴Niggagi ka Magboboot ki Mosis to “Limura nu ka mgo igbudyag to soini no mgo otow woy pambitadya nu to ma-allow to tangkaan to Magboboot, odyow no ogkabohow ka moinit no goinawa to Magboboot duon to Israil.”

⁵No niggagi si Mosis duon to mgo taaghusoy to koot-otawan to Israil to “Kara sagboka kaniu ogpurut to mgo otow now no naka-agpot to pogsadyo to Baal to Pior, woy ogpanghimatadyan now sikandan.” ⁶No tagood to nigsin-sinogow sikandan to gomawan to Tukbung to Pogtangko, duon otow to Israil no nig-aap to sagboka no boi to Midian duon to lunggunan din dio to tangkaan to pogpitow ni Mosis woy to tibon koot-otawan to Israil. ⁷Si Pinihas ian ka anak ni Iliasar woy apu ni Aaron no taagpanubad. To pogkakita rin to sikan, nig-ongkod sikandin to koot-otawan no nigkomkom to kommag din. ⁸Nigsundul si Pinihas to otow to Israil pohondio to tukbung din. Piggilak din sikandan daruwa no niglagbas ka kommag din to lawa to lukos to Israil pohondio to lawa to boi to diraom. No nighagtong

^e25:3 Baal, sagboka no ngaran to mgo tinuuhan to duma no mgo otow dongan.

ka mokohinhinaat no dau duon to mgo otow to Israil ⁹ di namatoy on ka 24,000 no otow to dau.

¹⁰ Nigkagi ka Magboboot ki Mosis to ¹¹ “Tongod ki Pinihas no anak ni Iliasar woy apu ni Aaron no taagpanubad na-awo ka kabou ku duon to mgo otow to Israil; hoo su unawa ka kandin no goinawa to goinawa ku tongod to ngaran ku no in-oog taliwaro kandan. Woy tongod to sikan waro ku toora ka moinit no goinawa ku to poghimatoy kandan tibo. ¹² No, nangoni nu sikandin no oghimu a to kasabutan to maawang no goinawa kandin. ¹³ Oghimu a to kasabutan kandin no sikandin woy ka kandin no mgo tipouri ka ogkohimu no mgo taagpanubad taman to katamanan su unawa ka kandin no goinawa to goinawa ku tongod to pogko-oog to Magboboot din, woy su pigpo-uli din ka mgo otow to Israil duon to Magboboot.”

¹⁴ Si Simri no anak ni Salu ian ka otow to Israil no namatoy duma to boi no matig Midian. Sagboka no igbudyag sikandin to sagboka no lunggunan no kapunganan ni Simion. ¹⁵ Woy ka boi no matig Midian no pighimatadyan ian si Kosbi no anak ni Sur no sagboka no datu to sagboka no lunggunan to Midian.

¹⁶ Nigkagi ka Magboboot ki Mosis to ¹⁷ “Ogdoromdomon nu no mgo usig nu ka mgo otow to Midian woy ogpanghimatadyan now sikandan, ¹⁸ hoo su unawa to nig-usig sikandan kaniu to poggawoy ran kaniu to nabadyaan now to Pior woy to pighimu ni Kosbi no atoboi ran. Sikandin sagboka no anak to datu to Midian no ian ka boi no pighimatadyan to poglopow to mokohinhinaat no dau tongod to Pior.”

Si Josue ka Ogsoip ki Mosis

27 ¹ 2No nigkagi ka Magboboot ki Mosis to “Takorog ka to soini no bubungan to mgo bubungan to Abarim, woy pantowa nu ka tano no inbogoy kud to mgo otow to Israil. ¹³ Takas to nakita nud on, songo ogpaka-agpot ka to mgo kabuybudyagan nu unawa to kakoy nu no si Aaron, ¹⁴ su to pog-atu to mgo otow dio to mgo woig to han-hanawan to Sin, nigligal kow daruwa to pogtood to sugu ku to pog-ila to pogkoin-oog ku to tangkaan dan.” (Sikan ian ka mgo woig to Miriba to Kadis to han-hanawan to Sin.) ¹⁵ Nigkagi si Mosis duon to Magboboot to, ¹⁶ “Marodyow porom, Magboboot no Igbudyag to tibon mgo gimukud to tibon mgo otow, ko og-aam ka to otow no og-aap to soini no koot-otawan. ¹⁷ Sagboka no otow no ogsood woy oglibuwas to tangkaan dan, no og-aap kandan to poghipanow

woy to poglibong odyow no ka koot-otawan to Magboboot kono ogko-unawa to puntuk to mgo karniru no waro taagbantoy.”

¹⁸No nigkagi ka Magboboot ki Mosis to “Puruta nu si Josue no anak ni Nun, sagboka no otow no pigsooran on to gimukud ku, woy sampoonga nu ka uu rin. ¹⁹Pasasindoga nu sikandin to tangkaan ni Iliasar no taagpanubad woy to tibon koot-otawan woy tinurua nu sikandin to pogpitow ran. ²⁰Ibogoy nu kandin ka katongod nu to pogboot, odyow no og-iloon sikandin to tibon koot-otawan to Israil. ²¹Oghasindog sikandin to tangkaan ni Iliasar no og-inso to pogboot to Magboboot pinabadyo to Urim^f. Woy on oghipanow ka tibon koot-otawan to Israil ko ogkagi sikandin, woy sikandin ka ogkagi odyow no oglibong sikandan. ²²Pighimu ni Mosis ka insugu to Magboboot kandin. Inpasasindog din si Josue to tangkaan ni Iliasar no taagpanubad woy to tibon koot-otawan. ²³No pigsampoongan din ka uu ni Josue, woy pigtinuru din sikandin no igbudyag sumao to innangan to Magboboot ki Mosis.

Mgo Lunsud no Aputanan woy ka Pogbunu

35⁶Ogkohimu no mgo lunsud no aputanan ka hon-om to mgo lunsud no igbogoy now to mgo kapunungan ni Livi. Ogpakapanlaguy dio ka otow no nakahimatoy to songo otow. Songo ogbogoy kow pad to 42 no mgo lunsud duon to mgo kapunungan ni Livi. ⁷To tibo, ogbogoy kow to 48 no lunsud duon to mgo kapunungan ni Livi duma to mgo sabsabanan no niglingut to sikan. ⁸Og-aamon now ka mgo lunsud no igbogoy now to mgo kapunungan ni Livi pinabadyo to koon-ingan to mgo lunsud no duon to tano to kara lunggunan to Israil. Ko moon-ing ka mgo lunsud dan, moon-ing ka igbogoy, di ko mointok ka mgo lunsud, maintok ka igbogoy.”

⁹No nigkagi pad ka Magboboot ki Mosis to ¹⁰“Kagii nu pad ka mgo otow to Israil woy nangoni nu sikandan to ‘Ko ogtalipag kow to Jordan no woig pohondio to Canaan, ¹¹aam kow to mgo lunsud no aputanan, no ian ka mgo ogkapanlagudyan to otow no nokohimatoy to songo otow no waro din tuura. ¹²Ogkohimu no aputanan odyow no kono oghimatadyan to taagsuli ka otow no pigbadyungan to nighimatoy tagood to waro pad sikandin noktangko to mgo otow to poghusoy. ¹³Ogkohimu no aputanan now ka sikan no hon-om no lunsud. ¹⁴Tatou ka lunsud no og-aamon now to soini no ilis to

^f34:21 Urim: Waro ki mataga ko nokoy lagboy soini, di piggamit to mgo taagpanubad to pog-inso to Magboboot ko nokoy ka boot din.

Jordan no woig, woy tatou ka og-aamon now dio to diipag dio to Canaan no mgo lunsud no aputanan. ¹⁵ Ogkohimu no aputanan sikan no hon-om no mgo lunsud odyow no ogkapanlagudyan to agad hontow no nakahimatoy to songo otow no waro din tuura, agad ko otow sikandin to Israil, woy ko dagpu, woy agad hontow no nig-ugpo taliwaro kandan.

¹⁶ Ko duon otow no ogbaras to songo otow pinabadyo to putow no kaaglagan no ogkamatoy ka otow, nakabunu sikandin, woy oghimatadyan now ka otow no nigbunu. ¹⁷ Ko duon batu no ogpakahimatoy duon to boad to otow, woy ogko-igu ka songo otow woy ogkamatoy ka otow, nigbunu ka niggon-gon to batu woy oghimatadyan now ka otow no nigbunu. ¹⁸ Woy ko duon kadyu no ogpakahimatoy duon to boad to otow, woy ogbarasan din ka songo otow no ogkamatoy ka otow, nakabunu ka nigbaras, woy oghimatadyan now ka nigbunu. ¹⁹ Ka otow no taagsuli to langosa no nigtigis ian ka oghimatoy to otow no nigbunu. Ko ogkitoon to taagsuli ka nakabunu oghimatadyan din. ²⁰ Ko duon otow no panoy ogbantak no og-usung to songo otow woy ko ogdogpakan din to botang no intuud din odyow no ogkamatoy ka otow ²¹ woy ko pinabadyo to pogdomot ogsuntukon din ka otow odyow no ogkamatoy, oghimatadyan now ka otow su nigbunu sikandin. Oghimatadyan to taagsuli to intigis no langosa ka nakabunu ko ogkitoon din. ²² Di ko waro maroot no goinawa no og-usung do ka otow to songo otow, woy ko ogdogpak to botang no waro din tuura ²³ woy ko og-uugan to batu no ogpakahimatoy di waro sikandin nakakita no duon otow to diraom no ogkamatoy ka otow, no tongod su kono no usig din, woy waro sikandin nigbantak to maroot, ²⁴ oghusadyon to koot-otawan to tangkaan to taagsuli to intigis no langosa no sikan ian no mgo udlin ka sosokoroy ran. ²⁵ Ogbantoy ka koot-otawan no kono oghimatadyan ka pigbadyungan to bunu to taagsuli to intigis no langosa. Iglibong dan sikandin pohondio to lunsud no aputanan no pigpanlagudyan din. Dio og-ugpo ka otow taman to pogkamatoy to igbudyag no taagpanubad no in-oog pinabadyo to pogbus-ug to lana. ²⁶ Di ko duon allow no oglibuwas ka otow to oatan to lunsud no pigpanlagudyan din ²⁷ woy ko ogkakitaan sikandin to otow no taagsuli to libuwasan to lunsud, ogkohimatadyan sikandin to taagsuli no kono ogkasonditan to bunu sikan. ²⁸ Og-ugpo ka otow no pigbadyungan to bunu dio to lunsud no aputanan taman to pogkamatoy to igbudyag no taagpanubad. Woy

on ogpaka-uli sikandin to kandin no tano ko ogkamatoy ka igbudyag no taagpanubad.

²⁹ Soini ka mgo udlin now to tibon mgo tipouri now, agad hondo kow og-ugpo. ³⁰ Woy now on oghimatadyi ka otow no nakahimatoy to songo otow ko duon ogpakanangon no nakita ran ka poghimatoy. Di waro otow no oghimatadyan now tongod do to pogkagi to sagboka ro no otow. ³¹ Dokow ogtinawaa ka badyad liwan to koudyagan to otow no nakahimatoy. Oghimatadyan now ro ian sikandin su sikan ka litos no logpad. ³² Dokow ogtinawaa ka badyad ligkat to otow no nakapanlaguy to sagboka no lunsud no aputanan odyow no ogpaka-uli sikandin poron to tano din to waro pad namatoy ka igbudyag no taagpanubad. ³³ Dokow ogligsomi ka tano no og-ugpaan now. Ogkaligsoman ka tano ko duon ogtigis no langosa to kamatadyon dio. Kono ogko-ulian ka tano tongod to intigis no langosa ko konon pinabadyo to langosa to otow no nigpatigis to langosa to songo otow. ³⁴ Dokow ogligsomi ka tano no ugpaan now no songo ugpaan ku, hoo su nig-ugpo a no Magboboot to taliwaro to mgo otow to Israil.”